

## **Fanm kréyòl II**

*Fanm...*

*Tini fanm-chatengn ki pa'a janmé pouri  
Silvyàn, fanm mèt-a-mannyòk a kréyòl  
Dani, Jilyèt fanm poto-mitan  
ki wouvè chimen pou dèt rantré*

*Tini fanm vayan-konbatan,  
mètédam kon Jèwti oben Lisèt  
ki sèvi drapo pou dèt fanm  
é ki goumé pou maléré touvé dinyité*

*Tini fanm ka mannyé hou fò  
kon Morisèt, fanm-kanm majò  
oben Natali, ka wouvè lèsprì asi  
bénéfis a manjé kréyòl piplis*

*Tini fanm ka kenbé pwennbik  
é ka flangé paj pli fò ki sab  
onjan ala...Mariz, pou montré  
bèlté, fòs é valè a makè kréyòl*

*Tini fanm koutiryèz kon  
Doudou Dyèz ka pran bèl twèl  
pou fè wòb kréyòl fè fanm  
dyézé douvan simagrè a lavi*

*Tini fanm ka monté bisiklèt  
fanm ka jouwé baskèt  
fanm ka kouri kous  
sotwèl é gazèl kon Marijo*

*Tini fanm rèldo a kilti an nou  
dansèz é chantèz  
Man Adlin, Jaklin é Aksidan  
vwa a gwoka, moun a Voukoum*

*Tini fanm dòktè-fèy, tisè a Lanati  
kon Mari ki pa'a j'en fèmé pòt  
ki sé granjou oben lannuit  
an bokantaj épi rimèd-hazyé*

*Tini fanm sèkrètèz  
biki a patwon san tèt  
Tini fanm ka kenbé lantoupriz  
pou alé an bon dirèksyon*

*Tini fanm chofè-kanmyon  
é menm fanm mékannisyen...  
Tini fanm... é Fanm ki ka....*

*Tini fanm....*

*Fanm é fanm  
men kèlanswa sa yo di oben sa ou fè  
Fanm, ou pa pipich a fanm  
Ou sé danmjann pozé anmitan kaz a Lavi*

*Ou sé bèl kofré ka pòté Limanité.*

*Miryèl CLODINE-FLORENT,*

*Février 2021*